



Groupe parlementaire

N°6695
Entrée le 22.08.2022
Déclarée recevable
Président de la Chambre des Députés
(s.) Fernand Etgen
Luxembourg, le 22.08.2022

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 22. August 2022

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här
Ekonomieminister, den Här Mëttelstandsminister an den Här Schoulminister weiderzeleeden.

Am Handwierk wieren aktuell circa 8000 Plazen nei ze besetzen. Dacks mangelt et awer u
qualifiziertem Nowuess, och well ganz vill Schüler léiwer op de Wee vun enger akademescher
Karriäre ginn. Dat läit ënner anerem dorun, datt d'Handwierk an der Gesellschaft an an den
Elterenhaiser en éischte schlechte Ruff huet, besonnesch wat d'Beruffschancen an d'
Verdénsgschtméiglechkeeten ubelaangt.

An deem Zesammenhang géif ech der Regierung gär dës Fro stellen:

- 1) Wéi eng konkret Moossnamen gesäit d'Regierung vir, fir den Image vum
Handwierk an der Gesellschaft an an der Schoul zukünfteg opzewäerten?

Mat déiwem Respekt,



Fred Keup
Deputéierten



Äntwert vum Minister fir Mëttelstand, vum Wirtschaftsminister an vum Minister fir Educatioun, Kanner a Jugend op d'parlamentaresch Fro n° 6695 vum 22. August 2022 vum Här Deputéierten Fred Keup.

Wéi eng konkret Moosnamen gesäit d'Regierung vir, fir den Image vum Handwierk an der Gesellschaft an an der Schoul zukünfteg opzewäerten?

Sou wéi schonn ë.a. an den Äntwerten op d'parlamentaresch Froen n° 1542, 3183 a 5737 geschriwwen, empfënnt d'Regierung et als wichtig fir jonk Leit fir den Entrepreneuriat am allgemengen an d'Handwierk am besonnesche kënnen ze begeeschten. An dëser Äntwert ginn déi speziell Mesuren, déi am Kontext vun der sanitärer Kris geholl goufen, net méi extra ervirgehewen.

D'Modernisatioun vun der Beruffsausbildung gouf an deene leschte Jore virugedriwwen mat ë. a. den Analyse vun verschidde Formatiounen op hir Adequatioun zum Aarbechtsmaart duerch d'Cellule de compétence pour la conception curriculaire de la formation professionnelle.

Zousazzertifikatioune goufen a verschidde Formatiounen agebaut wéi z. B. de *Kälteschein* vun der Ëmweltverwaltung oder nach d'Éischt Hëllef vum CGDIS. Och d' Offer un digitale Contenuen an der Beruffsausbildung gouf ausgebaut.

Fir der gesellschaftlecher Realitéit Rechnung ze droen, ginn ëmmer méi Formatiounen a méi Sproochen ugebueden. Sou gëtt net nëmmen méi op Lëtzebuergesch an Däitsch an der Beruffsausbildung ënnerriicht, mee och op Franséisch an Englesch (régime linguistique spécifique).

Et gi permanent iwwert d'Joren nei Formatioune geschafe wéi z. B. den Technicien en e-commerce oder nach den DAP Education.

Am Kontext Orientatioun op dat spéidert Beruffsliewe gouf d'*YEP - Schoulfoire* (YEP = Youth, Education & Professions) an d'Liewe geruff mam Objektiv vun der Orientatioun a Valorisatioun vun de Beruffer. Heimat waren de Léierplazendag, *LuxSkills* (national Beruffsmeeschterschafte mat iwwer 30 Concoursen an 200 Kandidaten) an déi kreativ Ateliere fir Kanner aus dem Cycle 4.1 & 4.2 (iwwer 50 Ateliere) verbonnen.

D'Promotioun vun den Handwierksberuffer gëtt am Cycle 4.1 mam Projet Hallo Handwierk am Fundamental (Coopératioun SCRIPT, Chambre des métiers a Maison de l'Orientalion) gelescht.

Divers Outilen an Zesummenaarbecht mat de Chamberen an der Maison de l'Orientalion goufen en place gesat:

- *Talentcheck/Basic Check*
- *Beruffsausbildung.lu* : Plattform vun de Chamberen, wou de Ministère elo nach derbäikënnt
- *Wëssensatelieren*

- *Science Center*
- *Makerspaces*

De Programm *Fit fir d' Léier* gouf agefouert, fir déi Jonk ze begleeden fir e Patron ze fannen.

A Punkto Attraktivitéit vum System an der Berufsausbildung gëtt nom Stufemodell "Kein Abschluss ohne Anschluss" geschafft, dat heescht, datt beim Ausschaffe vun neie Formatioune beschtméiglech drop opgepasst gëtt, keng Sakgaassen ze schafen. Nom CCP soll een DAP ugebuede ginn an dono een Techniker. Och do ass et méiglech, duerch d'Reussite vun de Modules préparatoires nach weiderzegoen an engem BTS oder Bachelor.

D'Zil vun der Reform vum Meeschterbréif ass et ë. a., dem "neie" Meeschter méi eng breetgefächert Approche an Outils mat op de Wee ze ginn, déi et him erlaben, op d'Erausfuerderunge vun haut an awer och vu muer kënnen ze äntweren. D'Image de marque vum Brevet gëtt soumat eropgesat an et ginn nei Perspektive fir jonk DAP-Schüler, Quereinsteiger (BAC, BAC +) an och Leit, déi no enger perséinlecher a berufflecher Erausfuerderung am Handwerk sichen, geschafen.

Well et primordial ass, dass d'Gesellschaft sech der Wichtigkeet vum Handwerk och bewusst ass, ass d'Regierung permanent beméit d'Promotioun vum Handwerk net nëmmen um Niveau vum Schoulwiesen ze gestalten, mä och de Stelleväert an d'Attraktivitéit vum Handwerk an der Gesellschaft héich ze halen. An deem Kontext sief op dëser Plaz nach eng Kéier un verschidde Campagnen erënnert, ë. a. :

- d'Austellung „De Mains De Maîtres“ déi d'Konschthandwerk promouvéiert ;
- de Programm HandsUp deen de jonke Leit an hiren Elteren ee positivt Bild vum Handwerk vermëttelt ;
- de rezent virgestallt Campagne vun der asbl „Jonk Handwerk“ fir d'Attraktivitéit vum Handwerk bei de jonke Leit weider ze fërderen ;
- déi grouss ugeluechte Media-Campagne « Makers of Luxembourg » déi d'Lëtzebuerger Handwerk promouvéiert.

Lëtzebuerg, den 27/09/2022

De Minister fir Mëttelstand

(s.) Lex Delles